

永樂大典

卷〇三六二 湖字

卷〇三六三 湖字

卷〇三六四 湖字

卷〇三六五 湖字

# 永樂大典卷之二千二百六十二

六模

## 湖

### 東湖

台州東湖赤城志東湖在台州府崇和門外三十步。初為舡塲水軍營。蓋端拱二年。張守蔚所建也。景祐中。運使段少連廢舡塲。

歸溫明二州。嘉祐中。徐守億徙水軍營入城。熙寧四年。錢守愐始開為湖。時方壘石脩城。以水至漂溢。故鑿湖以受衆水。且以其土隄城之東。絕後患焉。紹興二十年。蕭守振載加脩闢。乾道五年。向守均復披故道。荆城閘斗門。上覆以亭。又即故斗門。築三閘以通江。淳熙十一年。江守乙祖亦復脩焉。度其地凡一萬六千步。中有堂曰共樂。堂之前有亭曰派盃。皆址于湖心。錢守所立水光山色。涵映虛曠。為春夏行樂之冠。慶元三年。劉守坦之易名。知樂人止稱共樂也。跋遊東湖記。四明佳山水。而東湖特專其勝。余僑比邑。念一遊未遂也。一日天台朱君伯賢訪余藍谿上。出示遊東湖諸山五記。以極登臨覽觀之盛。而朔山泉石。獻奇於烟雲。杳靄間。千態萬狀。與夫琳宮梵刹。靈蹤秘蹟。歷歷模寫。隱顯弗遺。余得盡讀之。而東湖

之勝。宛在眉睫。若可冥交而默契者。殆與愚溪鉅鰕潭諸記。馳騁後先。宜無愧也。若其遇物遣情。達生順命。抑又過之。古今高人韻士。往往適趣山水。以摠幽發粹。蓋將託遊觀以養視聽也。君尚友古人。清才健筆。若此則所養可知矣。暇日追勝踐。以酬夙昔之懷。則是記有足徵者。至正壬寅夏四月。鎮陽張守正識。予嘗沂洞庭。至衡嶽矣。顧未適永柳之郊。讀柳子遊山水記。永柳不遺吾睫。會稽四明佳山水。予嘗遊焉。輒晨出夕返。慨不能熟覽其勝。以發奇氣。殆今未愜也。讀天台朱君伯賢遊雲門東湖諸記。服其善叙山川形勝。遊覽意態。宛若圖畫。後之能圖者。藉不即其地。按書槩可圖矣。豈不偉哉。然柳子記永柳山水。非其形勝可圖也。柳子被黜。姑托物以寓情耳。朱君以韋布遊名山川。心與境會。意興趣適。故其詞氣清逸。有非柳子之不得於物者。比也。因書于記後。善評是記者。必不以予言為非是。括蒼王庶識。山水林泉之勝。必有待夫騷人墨客之品題賦詠。而後顯聞。若匡廬。見於太白之詩。天台。見於興公之賦。而武夷九曲。見於朱紫陽之樵歌也。蓋其勝處。多在深僻遐曠。寂寞之濱。非得好事者杖履之追遊。觚翰之賞識。則夫仙蹤佛跡。巨靈幽秘。亦何由而得傳聞於世耶。凡游覽之士。又皆即其清淑之氣。蘊於胸中者。感發而形諸言。則其遊也。

為不徒行矣。四明佳山水。東湖為最。七山之僧坊道窟。兩湖之風烟月露。前人之宴豫廢迹。游覽感慨往往有人。而未有如吾友伯賢。吾姪元法。吾門宗器之。唱和成帙。其記峯巒林薄之尤美。朝暮止宿之幽期。又加詳焉。雖有不暇至者。覽之思過半矣。余亦好游者。故披閱而序之。羽庭劉仁本書。

台州府志江泌詩

臨海東城湖。氣象清且奇。無風綠色淨。十頃澄瑤

瑤。宋趙清獻公詩

過台州登巾子晚遊東湖巾頂廣軒逢抄秋萬家雲屋

接丹丘。主人欲盡行人樂。更向東湖共泛舟。

漳州東湖清漳志東湖在

漳州城東朝天門外。居水餘千畝。下通于河。溪流入焉。並湖之田。歲入以

萬計。灌溉資之。紹興間。湖以旱涸。至有請湖為田者。守劉才邵。倅林安宅。優民所請者。歸于公。瀕河置閘。又浚湖築斗門。以時啓閉焉。有新河閘記

乾道元年。詔郡國脩水利。守何侗。蠲民所佃魚蓮錢。以其土聚為十洲。脩斗門四。又於下流復斗門之廢者三。嘉定五年。倅林潛。安宅猶子也。謀復

舊迹。會守趙汝諧。莊夏。相繼脩水利。因故河閘而新之。繇是潮水可入。湖水不可泄。又於湖之傍淪為渠道。闊五丈。深一丈有半。又以東崗一處。舊

無斗門。蓋以居民連比。渠道不通。因得民陳濟家空地。官粥之。允渠穿路。築新斗門。通舊為十二。有記。詳見嘉定志。自是而後。湖之堙者。猶故。淳祐

壬寅守黃村。囑寓公楊士復。孫敏學。沒益深。築益密。而沿湖一帶田。得灌溉之利矣。湖亭有諸名公題詠。獨知龍溪縣林迪一絕。推明農田水利之本意。詩云。萬頃閑田占得多。平堤澆漾接東坡。流波散施連阡陌。餘事猶堪長芰荷。清漳集提舉劉棠同太守遊東湖。元元塵編日自迷。惟來

春色轉芳菲。吹噓氣象湖山遠。點綴工夫草木微。茅榼不辭傾美酒。揮戈寧解住殘暉。身閑官冷何欣幸。秉燭長隨五馬歸。知州郭祥正題阮希

東湖。東湖北淑水相通。十里荷花半白紅。冷艷已能消酷暑。暗香時復散清風。欲眠別浦無漁艇。且倚疎櫺學釣翁。雲起仙庭飛晚雨。洒然塵世

出樊籠。又和君儀海邊邂逅禁烟時。選勝携壺不可遲。日射山光如琥珀。水涵天影似琉璃。鶯隨柳絮翻羅幕。人並桃花映竹籬。却憶綠槐陰

下路。曾尋宮葉為題詩。知縣林迪聞伯育承事結絲舟。作樂遊東湖戲

寄四韻。湖波測測浸殘春。東郭閑筵迥不群。聞結絲舟撐碧落。更携簫

鼓度青雲。自憐玉海終無敵。却憶瓊漿意未分。伯育先寄詩。有與君分雨石之語。殊履難陪空悵望。且憑詩句張吾軍。次前韻。東陳君義欲傳

聞。雕鶚驚風果逸群。青竹題詩才倚馬。畫船撻鼓氣凌雲。賞心自向明時得。樂事應容下客分。敵飲會須醜玉海。肯河決勝看齊軍。知縣林迪東

湖。門巷深深過客稀。杖藜閑坐釣魚磯。醉來一枕華胥夢。肯教人間是與非。崎嶇世路苦風波。物外逍遙得趣多。門掩夕陽新睡覺。數聲時度

米菱歌。林梢乍過黃梅雨。湖面閑來白晝風。六月遊人不知暑。恍驚身在水晶宮。一曲清歌酒一觴。幅巾林下興何長。沙鷗似覺忘機久。時引

新雛過短牆。高下人家繞郡城。隔湖遙認笑談聲。黃庭閑罷無餘事。却倚朱欄看月生。採蓮遊女愜輕衣。爭弄蘭舟一葉飛。過盡綠荷人不見。

夜深時帶月明歸。詩壇碁戰兩無雙。分得壺中日月長。只恐明時搜隱逸。不容高蹈老滄浪。又題阮希聖東湖十絕。群山高下浸湖濤。暝靄

朝霞物物新。驛道更穿東北去。青銅影裏看行人。東湖水似鑑湖明。紅白蓮花自在生。祇有香風吹客坐。更無煩暑到簷楹。軒窗特地向湖開。

要客登臨共一杯。白鳥探魚常不去。清風吹水等閑來。一軒正在碧湖傍。蓮子枯時荇菜香。最愛夜深鷗鷺散。釣舡明月似瀟湘。門外青山几

按橫。卷簾幽坐少逢迎。一鉤香餌看魚上。萬頃金波待月生。一湖綠水當窻靜。百里青山卷箔開。只恐夕陽催客去。不妨幽鳥趁人來。一炷沉

烟一按書。怜君重葺紫雲居。溪山朝暮能新美。世事塵緣併掃除。鋤去蒿萊地勢平。開軒瀟洒瞰東城。湖山變盡朝昏景。只欠青秧一兩聲。誰



知城郭有山林。選勝營居遣壯心。一片遠烟添暮色。數聲歸鳥變春音。  
仙亭射的開崔嵬。紫翠飄飄落酒杯。更待春陰須一住。要看雷雨過湖來。

劉浚詩同前題四面溪山列畫屏。一堂新初有餘清。湖光隔斷紅塵路。  
疑在金鼇頂上行。輪蹄白日競匆匆。誰向閑中靜養蒙。珍重先生高卧

處。一窻黃卷是家風。兩堤楊柳先春綠。十里芙蓉入夏香。自得湖山供  
嘯傲。會稽何獨羨知章。福州東湖元一統志東湖。舊記在福州東北。周

回二十三里。晉嚴高築城。日與西湖同時開鑿。今漸湮塞。為民田。慶曆中。  
作記。只曰漸湮塞。是猶有湖也。元和郡縣志云。在閩縣北三里。泉州

東湖清源志東湖。在泉州晉江縣城東一里許。舊溉民田九千五百餘畝。  
莫知開濬年月名氏。於郡境諸湖為最大。當薛播為守時。已嘗設醴於東

湖。以待歐陽詹。時趙昌未開。尚書塘。後芟葑壅塞。幾成平陸。慶元六年春。  
正月。守劉公穎。始以錢米畀十五禪寺。使募工開濬。助以壯城。卒摠一萬

四千七百三十五丈。冬復開濬一萬四千三百四十丈。有奇。每丈各深四  
尺。積其泥為五山。於湖中。即西南隅置斗門四所。以通潮。因以為放生池。

歲久浸廢。豪民勢家規請為田。淳祐三年。守顏公順仲按故蹟。仍畀僧寺  
濬之。始於附郭。不足則均之旁近。以及遠。各視產高下。率以產錢千。賦役

七丈。使集傭夫官酬其直。凡浚五萬五千餘丈。積土為三山。中創二橋。復豐澤斗門置水利局。命僧司之。湖有公亭。唐貞元九年。守席公相。別駕姜公輔。嘗遊州人請於縣尹為立亭。歐陽詹記。後人併歐陽宴東湖序。刻于石。今存。面湖有亭曰清源勝境。又有思波亭。在班春亭後。慶元五年。劉公建舊有豐澤湖光聚星綠野等亭。今皆廢。顏公既浚湖。修三亭。改勝境曰勝樂。顏公復創二亭。曰涵虛澄碧。今澄碧亦廢。涵虛民以為公生祠。曹勛松隱集次韻李漢老叅政重陽前游泉州東湖郊亭十里繞風漪。一鑑先涵萬象微。勝址幾年因事廢。遺芳今日識公歸。鳳山前直供晨翠。鯨海旁連漲夕暉。少並江湖魚釣樂。綠蓑青笠鯁魚肥。豫章東湖豫章志東湖在郡東南周廣五里。鄴元云。東湖十里一百二十六步。北與城齊。迤折至南塘。本通大江。增減與江水同。漢永平中。太守張射築堤。以通南路。謂之南塘。以瀦水。冬夏不增減。水至清深。魚甚肥美。每夏月以水泛溢塘而過。居民多被水害。宋景元年。太守蔡興宗於大塘上更築小塘。以節水。為水門。水盛則閉之。多則洩之。自此水患少息矣。唐貞元二年。都督張廷珪奏。改曰放生池。而立碑焉。五年。江水踰塘一丈。觀察使李巽射率吏民以土囊固護。立碑以誌其事。碑既亡。九年。觀察使齊映復加修築。元和三年。



刺史韋丹。復建南塘斗門。以洩暴漲。遶湖築堤。高五尺。長十二里。明年江  
與堤平。無復水害。元和十三年。道州刺史韓偓。作東州亭記。宣宗時。塘  
東有三亭。曰孺子。曰碧波。曰涵虛。乾符中。因亂。悉廢。今復葺。豫章續志。開  
浚東湖。嘉定庚午。湖水汎溢。為患甚於他時。明年春。郡別駕豐有浚深  
軫民病。請於權府。計使胡公某。議所以開浚之。胡公然其請。且就委任之。  
於是大集土工。并畫棋布。衆力並舉。不踰月而辦。先是湖既湮塞。並湖居  
者。盡以厨廁侵逼入湖。汙穢狼藉。不堪舉目。豐公親按圖籍。開諭拆除。豪  
家巨姓。不得免。於是浚治增築。湖既泓深。隄亦堅固。沿隄上下。植以萬柳。  
繞湖周遭。通以行路。樓觀園圃。左右映帶。四時遊觀。車蓋相望。遂為江右  
勝踐。不但免居民湮浸之患而已。尚慮後人吝費。無能嗣而葺之者。復創  
修湖司。撥官田若干畝。專蒞倅廳。收積歲租。以脩浚湖之用。輿地紀勝。東  
湖。在隆興府。宋景平中。太守宋興宗。更築小塘。書地理志云。元和三年。刺  
史常丹。開斗門。雷次宗。豫章記云。水清至潔。而衆鱗肥美。又南豐徐孺子  
祠堂記云。南昌城西。有孺子墓。小洲上。有孺子宅。郭祥正。洪州絕句。東  
湖入望晚波平。蒲葉圓荷各自青。不用更尋徐孺宅。編茅堵竹一碑亭。張  
曲江集。臨浚東湖時。任洪州。郡庭日休暇。湖曲邀勝踐。樂職在中和。虛

心挹上善。乘流坐清曠。舉目眇悠緬。林與西山重。雲因北風卷。晶明盡不逮。陰影鏡無辨。晚秀復芬敷。秋光更遶衍。萬族紛可佳。一遊豈能展。羈孤忝邦牧。顧已非時選。良公世不容。長孺心亦偏。永念出籠繫。常思退疲蹇。歲阻風露嚴。日恐蘭若翦。佳辰不可得。良會何其鮮。罷興還江城。閑關聊自遣。宋戴石屏集。稼軒集。水湖亭。亭綠荷葉密密。罩清波。為見湖光小。却嫌荷葉多。宋梅菴大全集。自來湖至列岫。得二小詩。孺子高風何處尋。東

湖臺觀水雲深。生芻一束人如玉。此日淒涼萬古心。昨日來時萬里陰。長江雪後玉千岑。蒼茫不盡登臨意。重對晴天豁晚襟。趙蕃淳熙藻重過

來湖二首。憶昨追涼孺子亭。再來荷柳競凋零。試當止水憑欄看。我亦踈髯白數莖。牧車羸服豫章城。幾向東湖得細行。不但屢來人似識。白鷗

相慣亦忘驚。陳傑詩。來湖重遊如隔世。露雨暗池臺。蓬島又淺水。昆明幾却灰。蒼鵝飛底去。白鴈集何來。萬古南州土。荒祠一造哀。黃裳演山集。宴

瓊林。來湖春日遽暖。間俄寒。妙用向園林。難問春意。萬般聲與色。自聞雷便作浮華人世。紅嬌翠軟。誰頓悟天機。此理似韶容可駐。無人會。且忘言

閒醉。當度仙家長日。向人間。閒看佳艸。念遠處有東風在夢。悠悠往事。桃溪近。幽香遠。謾凝望落花流水。桂花中珠珮隨軒去。還從賣花市。

袁州東湖宜春志東湖在袁州東城外三十步至和二年郡守祖無擇始於湖上建臺榭為遊觀之所有樂遊堂廉堂讓堂休亭消暑亭風亭月臺米香閣米珠閣北有射棚南有盧石讓亭以避濮安懿王諱易為遜紹聖中郡守易廉堂為閱武堂以為教場又以盧石在遜堂之前易名盧石堂淳熙五年張公某知州事南軒先生拭過之為書東湖扁榜且易盧石堂為介亭仍題字榜側介亭之石本盧肇家故物也挺然特立望之有沒鰲

在湖淮南殷謀氣象予既取豫卦六二之義以題其亭併告來者共護持之紹熙元年郡守黃郡再修易休亭為平易堂米香閣為浮陰消暑亭風亭皆廢而為圓通庵令僧任掃洒之責庵傍創仁知軒開禧中郡守羅克開重修祖黃二守皆有記歲久湖淺涸鞠為園蔬蕪穢不治嘉定十三年郡守滕強恕始命開築植以芙蕖恨未能頓還舊觀也祖龍學集袁州東湖記袁城之東有湖焉上有四亭興自近歲厥後為州者耄昏不事事湖亭用不治以荒初予至州目其處不及往者三月既而吏曹務簡登城而觀水盈而甚汚屋雖存而將傾廼議葺之且官無羨財苟賦於民則予不為也閱封內之浮屠氏多藏者籍其餘什之一募匠購材一皆新之別為堂亭臺閣五植以珍木嘉果間以奇卉幽草紅葉綠荷雜襲波上於是

遊者日往焉。予樂州人之觀遊是好。遂署其中堂曰樂遊。其東堂曰廉循。屋之南其亭曰休。因城之高。其臺曰月。杭水而榭曰采香閣。為庖厨二。以供賓客。舊亭四。皆無名。亦名之。在樂遊之西者曰。避堂。堂北有射棚。南有石高丈餘。奇秀可愛。實自盧肇故宅徙焉。背城而東向者曰。采珠閣。閣後有石。亦惟舊廉與遊。采香。采珠。皆東西相值。據城之隅者曰。消暑亭。與月臺相屬。而差小者曰。風亭。其浮有航。其絕有梁。其登有磴道。其周有繚牆。南北其門。後溪前市。山煙水風。淵魚林鳥。明滅虛徐。浮沉下上。眺聽之際。可以釋幽鬱。可以道和粹。予以公事不得數自放於其間。月或一至。再至。蓋希矣。予猶以為數也。越二年。新太守在道。予行有日矣。因置酒為會同僚。舉觴屬予曰。湖亭雖舊。而增廣之以至大備者。非君而誰。不可以不聞於後。盡文而刻諸金石乎。予曰。池館之作。耳目之娛。非政之急。何足道哉。然此州。自江以西最為窮處。故朝廷往往以有罪者居之。予即其人也。或終年不達。王人出於其塗。非數君子相與樂此。予何以久處乎。後之踵予武者。其以才選而來。厥職是宜。政成民和。能無燕嬉之事歟。若以臯譴而來。又宜有登覽之羨。庶幾忘遷謫之累焉。繇是而言。則茲境也。當不廢矣。奚取於予文。如欲謹其歲時。請以斯言刻之。至和二年冬十一月一日。范

陽祖無擇記。宜春志黃劬重修東湖記。凡官事創於臆。與設而弗治。其差等耳。詒訓州。殊也。殊別於此。綏之齊之。抑思所以悅之。與悅之也者。其使由而弗知也。故國有園。都有園。園與國云者。默焉乎寓。豈徒為是將觀已。宜春東湖尚矣。至和中。已蕪沒。祖君來一營之。其別今歷歷然。而興且廢。其故不可考。顏仆決蝕。存者無幾。豈為政者不亟。是其力有不給。而物之情循環然耶。唯其地靈而天成之。萬象昭融。固自若也。余始至異焉。暇日一往。豁然心目。是胥樂之地。昔人既闢之矣。余弗力。其往而不復與。久之以無事。始及郡丞議。加葺焉。乃椽乃支。乃櫨乃葺。其不可缺而新之者。不與也。之介之樂游。東西闢兩翼。盡湖之趣焉。之月臺勝觀也。名以語局。曰熙登。同民志也。表以門扁。增舊堵為堂三間。梁隙以行。亭其上。堂曰平易。使觀納也。亭曰浮蔭。知魚之樂乎。其北俯秀江。直袁山。為軒焉。曰仁知。靜以觀動也。孰汎掃之。新築所由立也。錙銖之費。不以厲民。官所役阜。亦別廩之。民知余之相之也。觀者聞溢。忻然一辭。夫物莫具美。若或靳之。二華。九疑。七澤。三湘。峭崿困浩。旁連坤軸。得而私焉者。否也。彼窮土木者。流丹散藻。薨棟驚飛。類謹于闥牆之外。無睹也。今而開拓宛然。迫而不驚。迺無勤焉。環江山之秀。萃乎一覽。曰。陂池臺榭。庭宇梁磴之屬。靡不具。而水

石林楸。魚鳥菰蒲之樂。凡而生聚優游其中。皆得而共之矣。跡之所歷。實僅有之。說而忽諸。可乎哉。余既以餘力新之矣。新而敝。復何裨焉。惟來者知其故。毋隳其舊。民其迄熙熙然矣。豈無所助云。紹熙元年二月十八日起工。十二月朔記。王雲東湖詩。湖景甲東城。亭臺相照清。地分春色

早。波動日華生。絕勝新圖展。涵虛古鑑明。綠楊煙岸側。風約釣舟橫。三月前頭二月天。湖亭雄絕富韶妍。石形卓犖虎蹲岸。牆影浸波龍卧淵。向

日鮮明花曝錦。隨風零亂柳飛綿。春來此地堪行樂。誰共賞心張雅筵。祖龍學集李素伯題袁州東湖呈龍學。萬象城東雅入詩。半湖雲靄卷殘

輝。老龍惜雨慵離蟄。幽鷺逢人慣不飛。岸僻自宜安釣石。水清誰礙濯塵衣。使君公退便遊此。却恐吾皇急詔歸。再呈。郡藏好景有東湖。誰道

蓬萊遠無路。水底芙蓉謾托根。爭如岸上甘棠樹。客來坐見碧波中。魚跳潑刺潏尾露。下釣不及呂尚賢。明月清風又歸去。饒州東湖饒州府志

東湖。在饒州。一名督軍湖。湖中有洲。乃吳芮將梅銷督軍臺也。其水南注于江。唐曹松詩江西題東湖。鑿出江湖思。凉多爽氣聞。無風觸微浪。半

日到秋山。客袖沙光蒲。紅憲荻影閑。時人見黃綬。應笑狎鷗還。彭汝礪鄱陽集癸未偕子中都官文淵節推遊東湖分題和子中湖字韻。泛泛林



邊晚。扁舟憶五湖。丹青難作賦。水墨好為圖。龍蟄雲長在。霜寒草自枯。詩翁足幽興。瀟洒在蓬壺。又和子堅同游東湖詩字韻小徑行幽草。回塘

汎杪秋。風波魚自樂。芹藻鴈同游。暇日容携酒。晴天好放舟。夕陽歸旆晚。更向水邊留。又遊東湖。草色蘼葭蘆葦中。蓮花一片萬枝紅。斜陽色

妬波心日。細雨香吹水面風。澤國地開金色界。桃源人在水晶宮。扁舟便好如張翰。好在溪邊舊釣筒。番易志。東湖在餘干縣學之南。安福縣東

湖。輿地紀勝。東湖在安福縣東南。水石幽勝。唐趙居士之故居。武陵東湖。武陵圖經。東湖有二。一在武陵縣郡城東。周數里。受白馬湖之派。一

在武陵縣城內東南隅。周二里。本官棄地。勢下瀦水。寶慶二年。林農丞岳屬置寨。官濬之填窪。以種蔣花木荷菱。南以城為堤。北接官道。散布亭榭。

縱邦人遊觀。後袁監丞申儒增飾之。有魏鶴山了翁記。鶴山渠陽雜抄。常德府東湖記。或作東園。大府寺丞四明林公。以湖北路詳刑使者。治常

德府會攝守事。乃寶慶三年之秋。繕城浚隍。得城東廢地為園。與民共之。臨邛魏某嘗被命守是邦。旋以旱戾徙靖。實公所部。明年命記。成事不敢

以寡陋辭。東門之衍。籍于侯都。溝封弗戒。歲異月殊。斷潢裂壤。榴翳所於。帝命林公。使節州符。靡微不究。蜀蠹弗除。溥彼武陵。城郭虧疏。言坯言棟。

相彼閨闈。彼城之隅。有輝其湖。顧為賓佐。風氣之儲。而是陲阮。盡辟而膝。略址賦文。度財庀徒。自朝宗門。迄西南郭。東西攢修。其廣百堵。埤厚潛深。剔疏沮洳。信偃起伏。披聾發聵。乃基乃堂。攸館攸宇。藪之卉木。沈沈渠渠。為梁十所。可舟其下。更鄭氏樓。以門其圃。驚橋為防。以泄以瀦。以流其惡。以戒不虞。公與其屬。于方于車。踈視淪聽。志明體舒。侯士若民。于曳于婁。節宣勞佚。聲和氣愉。自有宇宙。山川與俱。奚隱乎人。今有昔無。如艮止健。久畜弗舒。霍然陽開。何天之衢。又如睽孤。或承或孤。遇雨之吉。群陰畢驅。如人心然。所居廣居。所立正位。所履大塗。為閑不用。謬迷厥初。一日克己。我室我廬。不假外求。隨處裕如。下客不佞。記事之餘。請歌唐風。以儆宴娛。其詩曰。無已大康。職思其居。武昌東湖元一統志東湖在武昌府城東四里。湖上有園。為近城登覽之勝。中州元氣集李章東湖曲武昌女兒顏如玉。夜夜抱寒溪上宿。朝來懶上木蘭舟。落日悲歌采蓮曲。袖中忽惹藕絲長。不與行人繫斷腸。情多觸處不稱意。沙頭更見雙鴛鴦。斜風蕭蕭吹雨落。乍寒不管羅衣薄。空將荷葉蓋頭歸。搖指鳳凰山下泊。未起岩東塘集只說西湖在帝都。武昌新又說東湖。一圍烟浪六十里。幾隊寒鷗千百雛。野水迢迢遮去鴈。漁舟點點映飛鳥。如何不作錢塘景。要與江城作畫

圖。項安世梅堦後編自笑知州百不知。近他池館未曾窺。主人正可今為客。和議初成恰是時。草色茸茸花覆座。波光艷艷酒浮卮。留連枉是憑欄久。洗得當年了事癡。衡州東湖衡陽志湖在衡州耒陽縣東四里。周回八里。深三丈。長沙東湖長沙府志湖在長沙府湘陰縣東。又名澄鮮湖。闊可五里。受潑水江水。入縣江。春夏水漲成湖。通前湖為放生池。唐百家詩戴叔倫莫春遊長沙東湖贈辛兗州巢父湘流分曲浦。繚繞古城東。岸轉千家合。林開一鏡空。人生無事少。心賞幾回同。且復忘羈束。悠悠落照中。回環路不盡。歷覽意彌新。古木畬田火。澄江盪槳人。緩歌尋極浦。一醉送殘春。草恨長沙遠。他年憶此辰。李羣玉詩三月五日陪裴大夫泛長沙東湖上已餘風景。芳辰集遠壩。綵舟浮泥蕩。綉轂下娉婷。林樹回蔥蒨。笙歌轉杳冥。湖光迷翡翠。草色醉蜻蜓。鳥弄桐花月。魚翻穀雨萍。從今留勝會。誰看畫蘭亭。荊州東湖郡縣志東湖在荊州府峽州遠安縣境。元一統志東湖在公安縣五里。法華寺東北。張商英建傍敞蓮湖。廣袤數里。時與名賢泛舟遊賞。有東湖賦。賦曰。紛不知吾之所如芳。獨漫漫而若狂。乘醉飽之餘力芳。遂涉嶽而緣峒。惟大冬之果烈芳。莽川澤之茫茫。農功休乎場圃芳。平陸散夫牛羊。憫大木之百圍芳。慘赤立而無裳。鶴